



Minggu, 29 November 2020

Ogen: Masmur 127:2



Tuhan Si Mere Rejeki



Adi lit kalak si arah usahana akapna maka ia rulih, sia-sia kap usahana e. Rusaha sekalak, erjuang sekalak adi la nginget Tuhan e seri ras kalak lenge. Kerina siidahikenna la maba kemalemen ate. Icontohken ku bas kala mbangun rumah tangga, adi la ras Tuhan rumah tangga e la bahagia, dem perjengilen ras perubaten. Bali ka ras kalak si njaga kota tetap ngawasi musuh gelah ula nerang kota e, latihna ngenca akapna keriahen e lalit i bas ia. Iumpamaken ka pe bagi sekalak perjuma, lampas medak, erpagi-pagi si lampas enggo sibuk ngaturken keperluan gelah berkat ku juma, melawen ka kari maka mulih juma nari. Kalak si bage pe adi la ras Tuhan labo gejpna kemalemen ate. Pemasmur mabai kita wari enda gelah kai pe sidahiken kita si teptep warina tetap kita ernalem ras erpersukuten kempak Tuhan. I bas ndahiken dahin e si bahan lebe perencanaan alu mehuli, alu erbahan kreasi-kreasi si mbaru, tapi tetap ninta adi iueken Tuhan. Labo dalih melamun ras erbayang guna masa depan kegeluhen ras pendahin tapi ukurilah bagi si ngena ate Tuhan. Percuma kap encari alu latih erdahin, lampas medak dingin melawan tunduh, ertina erdahin sibuk, melala si bahan dahinta guna nambahi pemasuken, e sia-sia adi la ernalem man Tuhan. Sebab Tuhan mereken rejeki man kalak si ikelengina tupung si ikelengina sangana Tunduh. Banci pe tunduh erkiteken enggo iendeskenna kerina pendahinna ku Tuhan, la aru atena, teneng ras badeh pertunduhna.

Tupung tunduh kita la ngasup erbahan kai pe, la kita ergegeh, paksana labo rukur, ije me Tuhan masu-masu kita, mereken kita gegeh si mbaru, ipedauhna arah ukur kalak si ilat, ipasu-pasuna pendahinta, iberena kita rejeki. Seh erpagi-pagi ipemedakna kita bas tunduhta nari, senang kulanta, sehat ras ergegeh ka kita ndalani wari si mbaru. Bage ka me perbahanenNa man isi jabunta, sangkep nggeluhta ras teman-temanta. Ngatakensa rejeki e labo kita si mperjuangkensa, labo usahanta, tapi pemere Tuhan. Kita erdahi e nehken tanggungjababta man Tuhan si nuruh kita erdahin, tapi keperluanlunta si teptep wari e rehna bas Tuhan nari.